

# In general sco president da la confederaziun

Johann Ulrich Ochsenbein (1811–1890)

DA JOHANN ULRICH SCHLEGEL


■ Avant 200 onns, ils 24 da november 1811 è naschi a Fahrni sper Thun il general e politicher svizzer Johann Ulrich Ochsenbein. El daventa il fundatur da la Svizra moderna. Avant che perder suenter il 1848 sia forza ed influenza tranter las fronts a sanestra ed a dretga dat el la tempra inextinguibla a nosa Svizra dad oz.

## La simpladad e la diversidad

Johann Ulrich Ochsenbein è il segund da diesch uffants d'in pur, ustier e margadant da chavals e crescha si en cundiziuns plitost povras. A l'entschatta abita sia famiglia a Fahrni sper Thun, pli tard a Marnand en il Vad. Sco scolar senza duns pli gronds ha il giuven Johann Ulrich Ochsenbein l'avantag d'avair il stretg contact cun duas domenas culturalas e d'emprender perfergmain duas linguas sco linguatgs materns. Quai avra ad el la porta ad ina carriera excellenta. Suenter il gimnasi a Bienna studegia el giurisprudenza e daventa advocat a Nidau. L'adolescenza dad Ochsenbein sa splega durant ina da las fasas las pli agitadas da l'istorgia svizra – ina maschaida tranter sutmissiun totala a l'exteriur cun revoluziun e cuntraevoluziun e cumbats interns extrem: liberals radicals cunter tradiziunalists ultraconservativs. Uss arriva il mument per Johann Ulrich Ochsenbein. Sco ina spungia sitga ha il giuven advocat absorba las tendenzas spiertalas actualas. Ses mandat sco jurist ha preparà el per il sigl en la vita publica: La guerra e finalmain ina constituiun dal stadi stabilisada.

## Il general dals revoluziunaris

Ochsenbein na fa betg mo ina stupenta carriera professiunala, ma avanza spert er en l'armada. El absolva la scola dal stab general e daventa commember da quest gremi militar. Uffiziers revoluziunaris cun ina tenuta radicala han lura l'idea da surdar ad Ochsenbein la direziun d'in uschenumnà corp da voluntaris che duai attatgar Lucerna, in stadi catolic e conservativ. Ina tala offensiva cunter ils stadis conservativs ha gia lieu ina giada. Ma ussa cun Ochsenbein a la testa, ina personalitad che cumbinescha ina creanza mundana cun in dun retoric extraordinari, speran numerus radicals da finalmain pudair rumper las bastiuns conservativas en il pajais.



Johann Ulrich Ochsenbein.

FOTOS KEYSTONE

## Ina carriera politica impressiunanta

Johann Ulrich Ochsenbein arriva il 1845 cun ses corp da voluntaris, adina fitg damanaivel da l'ur da l'illegalitad, davant las portas da Lucerna, da lez temp il pli pussant stadi da tut las forzas conservativas dal pajais. Sco quai ch'ins suppona en general quinta el cun il succurs dal pievel. Ma cura che Ochsenbein realisescha che lez na vul betg rebellar, survegn el dubis. Gist anc plain persvasiun ed entusiassem daventa el tuttenina malsegir e pessimistic. Quai vala sco il punct d'inversiun du-

rant questa attatga dal corp da voluntaris. Malgrà che la victoria è imminente, desista el dad ulteriuras offensivas. Las atgnas perditas en considerablas. Questa episod è ina clav per emprender da chapir Ochsenbein pli da radent. El, l'inspiratur imposant, il grond oratur, il talent da manar, è adina puspè suttemess a fermes dubis e grondas intschertezzas. Ma sch'ins chava pli profundamain, revelescha quai ch'ins pudess considerar sco deblezza gist in da ses tratgs caracteristics: Sia capacitad da resister a soluziuns extre-

mas resp. a soluziuns puramain violentas. A quest tratg caracteristic dad Ochsenbein, la finala in tratg fitg positiv, ha il pajais d'engraziar per in gronda part il fatg d'avair chattà cumpromiss ed adattaziuns adequatas.

Èsi stà in presentiment zuppà en las vastas profunditads da l'olma dal pievel? Èsi stà in segn da las forzas da la natira en il rodam dals mecanissem da l'istorgia? La sconfitta na fa en mintga cas betg donn a la reputaziun dad Ochsenbein. Anzi, ins al celebrescha sco in erox. Anc l'october dal medem onn daventa el a Berna deputà e l'onni 1846 commember dal cussegl da la constituiun e vicepresident da la regenza. Igl è il temp ch'ils chantuns catolics fundan l'uschenumnada Lia separatista e volvan il dies a l'ulteriura Svizra. La stad dal 1847 vegn Ochsenbein elegi sco president da la regenza bernaisa. Ma Berna è la sedia principala da la Svizra ed uschia vegn Ochsenbein a la testa da l'entir pajais: El daventa president da la Confederaziun svizra.

## L'emprim cusseglier federal betg reelegi

Sco president da l'entir pajais avra el la direziun suprema dal stadi, la dieta, che sa cumpona da la radunanza dals delegads dals chantuns. Betg mo formalmain è el ses portavusch. El è era ses furmader carismatic. Dal tuttafatg conform al spiert dal temp ch'è francà cleramain a sanestra, per formular quai a moda moderna e placativa, pia sin la vart dals radicals, annunzia Ochsenbein la fundaziun d'ina confederaziun collectiva. Cun gronda atenziun e tscheras ostilas taidlan ils diplomats da l'exteriur, che represchantan las pussanzas monarchicas conservativas da l'Europa, il pled democratic che demussa quant fermamain ch'il president da la confederaziun è persuadi da sasez e da sias ideas. Tenor la devisa che l'attatga saja la meglra defensiun smanatscha el avertamain da revoluziunar las monarchias vischinas. La radunanza consenta a las propostas dad Ochsenbein che pretendan la dissoluziun da la Lia separatista, sche necessari era cun mesiras militaras. Anc la fin d'atun dal 1847 sforza il general da l'armada da la dieta, Henri Duvour, la capitulaziun dals renegats. Il 1848 cuntanscha Ochsenbein il punct culminant da sia carriera. El vegn elegi sco president da la cumissiun per la revisiun da la Constituziun federala. En mo 51 dis elavura

quest gremi sut l'egida dad Ochsenbein la Constituziun federala che vegn approvada curt suenter e che vala anc adina. La Svizra daventa il stadi federal dad oz. L'october 1848 daventa Johann Ulrich Ochsenbein in dals emprims cussegliers federals. Gia dapi in temp è el sa distanzià da la tenuta dals radicals. El s'avischina als adversaris d'antruras, ils conservativs, e contribuescha il 1850 schizunt a la cupitga dal guvern radical dal chantun da Berna. Uschia croda el però tranter las fronts da las gruppaziuns sanestras e dretgas. Il 1854 è el l'emprim cusseglier federal che na vegn betg reelegi ed el perda insumma sia piazza en la politica. L'existenza economica da Johann Ulrich Ochsenbein è fermamain periclitada. Ina pensiun per anteriurs politichers na datti betg, la clientella da sia advocatura a Nidau ha daditg tschertgà sustegn utrò. Il grond um, il talent da manar e scheni politic, stat d'in di sin l'alter senza meds finanziaals cun sia dunna ed otg uffants fomentads davant il nagut. E tut quai durant ina crisa economica severa.

## L'imperatur Napoleun III nominescha Ochsenbein sco general franzos

Lain turnar al caracter da l'um che ha subi l'umiliaziun da betg veginir reelegi. Ochsenbein è in pragmaticher. El na suonda naginas posiziuns extremas. Ma el po cumbatter. El è direct e da ferm caracter. El mussa da viver a la glieud da sanestra fin a dretga. El smanatscha a retgs ed imperaturs da l'exteriur cunfinant. E cun quai essan nus tar il punct il pli impurtant: En mintga cas è el in um che merita il pli aut respect.

Il proxim stgalim da sia carriera, a l'emprim sguard in pass che far surstar, para cun quai plausibel e consequent. Nagin auter che l'imperatur franzos, Napoleun III, pli baid in inimi dad Ochsenbein, fa dal Svizzer in general franzos, quai ch'è senz'alter pussaivel fin che la Constituziun federala vegn revedida il 1874. Ochsenbein daventa cumandant da la legiun estra, cumandant local da Lyon e general d'ina divisiun a Bourg-en-Bresse. El vegn fatg chavalier da la legiun d'onur.

Suenter sia carriera politica e militara sa retira Ochsenbein sin ses bain a Nidau e sa deditgescha a l'agricultura ed al scrire. El mora ils 3 da november 1890 en la vegliadetgna da bunamain 79 onns.



Cussegl federal l'onni 1848: Sisur sanester Johann Ulrich Ochsenbein.



Funtauna en onur da Johann Ulrich Ochsenbein.